



საპროკურორო საბჭო
Prosecutorial Council

№

20

განკარგულება №3

13 ივნისი 2025 წელი

ქ.თბილისი

საქართველოს გენერალური პროკურორობის
კანდიდატების შერჩევის წესის დამტკიცების შესახებ

„პროკურატურის შესახებ“ საქართველოს ორგანული კანონის მე-19 მუხლის მე-13 პუნქტის „ა“ ქვეპუნქტის, მე-20 პუნქტის, მე-16 მუხლის მე-4, მე-5 და მე-6 პუნქტების, საპროკურორო საბჭოს დებულების მე-3 მუხლის მე-6 პუნქტის „ა“ ქვეპუნქტისა და მე-4 მუხლის პირველი პუნქტის საფუძველზე, საპროკურორო საბჭო ადგენს:

1. დამტკიცდეს საქართველოს გენერალური პროკურორობის კანდიდატების შერჩევის თანდართული წესი.
2. ეს განკარგულება ძალაშია მიღებისთანავე.

საპროკურორო საბჭოს თავმჯდომარე

ლონდა ზიჭიკაშვილი

საქართველოს გენერალური პროკურორობის კანდიდატების შერჩევის წესი

მუხლი 1.

ეს წესი განსაზღვრავს საპროკურორო საბჭოს მიერ საქართველოს გენერალური პროკურორობის (შემდგომში გენერალური პროკურორის) კანდიდატის შერჩევის წესს.

მუხლი 2.

1. საპროკურორო საბჭოს წევრების მიერ გენერალური პროკურორობის კანდიდატის წარმოდგენის შემდეგ, საპროკურორო საბჭოს სამდივნო ამოწმებს გენერალური პროკურორობის კანდიდატის შესახებ წარმოდგენილი დოკუმენტების შესაბამისობას საპროკურორო საბჭოს 2025 წლის 13 ივნისის №2 განკარგულების №1 დანართთან. ხარვეზის აღმოჩენის შემთხვევაში, საპროკურორო საბჭოს სამდივნო აღნიშნულის შესახებ ატყობინებს კანდიდატს და მის წარმდგენ საბჭოს წევრს და ხარვეზის აღმოსაფხვრელად აძლევს გონივრულ ვადას.
2. საპროკურორო საბჭო განიხილავს გენერალური პროკურორობის კანდიდატებად წარმოდგენილი პირების (შემდგომში პირი) „პროკურატურის შესახებ“ საქართველოს ორგანული კანონის მე-16 მუხლის პირველი პუნქტით დადგენილ კრიტერიუმებთან შესაბამისობას.
3. საპროკურორო საბჭო, გენერალური პროკურორობის კანდიდატების მიერ წარმოდგენილი დოკუმენტაციის კრიტერიუმებთან შეუსაბამობის შემთხვევაში, სხდომის დამსწრე წევრთა უმრავლესობით, ადგილზე კენჭისყრით იღებს გადაწყვეტილებას კანდიდატის შერჩევის პროცესიდან მოხსნის თაობაზე.
4. დოკუმენტაციის განხილვის საფუძველზე, საპროკურორო საბჭო კენჭს უყრის და ანბანური თანმიმდევრობით ადგენს საპროკურორო საბჭოს წევრთა მიერ გენერალური პროკურორობის კანდიდატებად წარმოდგენილ იმ პირთა ერთიან სიას (შემდგომში სია), რომლებიც აკმაყოფილებენ „პროკურატურის შესახებ“ საქართველოს ორგანული კანონის მე-16 მუხლის პირველი პუნქტით დადგენილ კრიტერიუმებს. აღნიშნულის შესახებ საპროკურორო საბჭო ატყობინებს სიაში შეყვანილ პირებს.
5. გენერალური პროკურორობის კანდიდატებად წარმოდგენილ პირთა ერთიანი სია გამოქვეყნდება საპროკურორო საბჭოს ოფიციალურ ვებგვერდზე და ფეისბუქ გვერდზე.
6. საპროკურორო საბჭო უფლებამოსილია სხდომის დამსწრე წევრთა უმრავლესობით, ადგილზე კენჭისყრით მიიღოს გადაწყვეტილება გენერალური პროკურორობის კანდიდატებად წარმოდგენილი პირების მიმართ დამატებითი ინფორმაციის მოძიების თაობაზე.
7. ამ მუხლის მე-6 პუნქტის შესაბამისად, საპროკურორო საბჭოს სამდივნო ახორციელებს გენერალური პროკურორობის კანდიდატებად წარმოდგენილი პირების შესახებ დამატებითი ინფორმაციის მოძიებას. სამდივნო ვალდებულია ინფორმაციის მოძიებიდან არაუგვიანეს 1 დღისა, საპროკურორო საბჭოს წევრებს და კანდიდატად წარმოდგენილ პირს გაუგზავნოს დამატებითი მოძიებული ინფორმაცია.

მუხლი 3.

1. საპროკურორო საბჭო, სიაში შეყვანილ პირებთან ატარებს ინდივიდუალურ გასაუბრებას.
2. საპროკურორო საბჭო, სიაში შეყვანილ გენერალური პროკურორობის კანდიდატებს გასაუბრებაზე იბარებს ანბანური თანმიმდევრობით. გასაუბრება იწყება ერთიანი სიის შედგენიდან გონივრულ ვადაში.
3. საპროკურორო საბჭოს სამდივნო გენერალური პროკურორობის კანდიდატებად წარმოდგენილ პირებს ტექნიკური საშუალებით, გონივრულ ვადაში ატყობინებს გასაუბრების თარიღსა და დროს.
4. საპროკურორო საბჭოს სხდომაზე გასაუბრების დაწყებისას გენერალური პროკურორობის კანდიდატი საპროკურორო საბჭოს წარუდგენს საქართველოს პროკურატურის განვითარების შესახებ საკუთარ ხედვას, რის შემდეგაც, საპროკურორო საბჭოს თავმჯდომარის მიერ განსაზღვრული თანმიმდევრობით, საპროკურორო საბჭოს წევრები კანდიდატს დაუსვამენ კითხვებს, მათ შორის, დამაზუსტებელ შეკითხვებსაც.
5. საპროკურორო საბჭოს თავმჯდომარე უფლებამოსილია საბჭოს წევრს შეაწყვეტინოს ან/და მოხსნას ისეთი კითხვა, რომელიც სცილდება ეთიკის ფარგლებს.
6. გენერალური პროკურორობის კანდიდატად წარმოდგენილი პირის მხრიდან გასაუბრებაზე განყენებულ თემებზე საუბრის შემთხვევაში, საპროკურორო საბჭოს თავმჯდომარე უფლებამოსილია კანდიდატს შეაწყვეტინოს საუბარი.
7. გენერალური პროკურორობის კანდიდატად წარმოდგენილი პირის მხრიდან გასაუბრებაზე არაეთიკური ქცევის შემთხვევაში, საპროკურორო საბჭოს თავმჯდომარე უფლებამოსილია შეწყვეტოს გასაუბრების პროცესი. საპროკურორო საბჭო ადგილზე კენჭისყრით, სხდომის დამსწრე წევრთა უმრავლესობით გადაწყვეტს ამ პირის შერჩევის პროცესიდან მოხსნის საკითხს. თუ საპროკურორო საბჭო მხარს არ დაუჭერს გენერალური პროკურორობის კანდიდატად წარმოდგენილი პირის შერჩევის პროცესიდან მოხსნის საკითხს, აღნიშნულ პირთან გასაუბრება გადაიდება განსაზღვრული დროისათვის, რის შესახებაც ეცნობება კანდიდატს.
8. გენერალური პროკურორობის კანდიდატად წარმოდგენილი პირის გასაუბრებაზე გამოუცხადებლობის შემთხვევაში, საპროკურორო საბჭო ადგილზე კენჭისყრით, სხდომის დამსწრე წევრთა უმრავლესობით იღებს გადაწყვეტილებას შერჩევის პროცესში კანდიდატის მონაწილეობის ან/და მოხსნის თაობაზე.
9. საპროკურორო საბჭო არ განიხილავს იმ პირის კანდიდატურას, რომელმაც მოხსნა თავისი კანდიდატურა. საპროკურორო საბჭო ადგილზე კენჭისყრით, სხდომის დამსწრე წევრთა უმრავლესობით, ერთიანი სიიდან ამორიცხავს იმ კანდიდატს, რომელიც უარს აცხადებს შერჩევის პროცესში მონაწილეობაზე.
10. გენერალური პროკურორობის კანდიდატებად წარმოდგენილ პირებთან გასაუბრების აუდიოჩანაწერი არის საჯარო.
11. გენერალური პროკურორობის კანდიდატებად წარმოდგენილ ყველა პირთან გასაუბრების დასრულების შემდგომ, საპროკურორო საბჭო ატარებს ღია კენჭისყრას. გენერალური პროკურორობის კანდიდატებს საპროკურორო საბჭოს სხდომაზე ცალ-ცალკე ეყრებათ კენჭი.

კანდიდატი მხარდაჭერილად ჩაითვლება თუ მას ხმას მისცემს საპროკურორო საბჭოს სრული შემადგენლობის უმრავლესობა. თუ წარდგენის პროცესში 1 კანდიდატი მონაწილეობდა და მან ვერ დააგროვა ხმების საჭირო რაოდენობა, წარდგენის პროცესი ხელახლა იწყება. თუ 2 კანდიდატი მონაწილეობდა და ვერცერთმა ვერ დააგროვა ხმების საჭირო რაოდენობა, იმ კანდიდატს, რომელმაც მეტი ხმა მიიღო, ხელახლა ეყრება კენჭი. თუ მან ამ შემთხვევაშიც ვერ დააგროვა ხმების საჭირო რაოდენობა, წარდგენის პროცესი ხელახლა იწყება. თუ 2-ზე მეტი კანდიდატი მონაწილეობდა და ვერცერთმა ვერ დააგროვა ხმების საჭირო რაოდენობა, იმართება მეორე ტური იმ 2 კანდიდატს შორის, რომლებმაც ყველაზე მეტი ხმა მიიღეს. თუ ამჯერადაც ვერცერთმა კანდიდატმა ვერ მიიღო საპროკურორო საბჭოს არანაკლებ სრული შემადგენლობის უმრავლესობის მხარდაჭერა, საპროკურორო საბჭო, 1 კვირის ვადაში, პროკურატურის შესახებ საქართველოს ორგანული კანონის მე-16 მუხლის მე-4 პუნქტით გათვალისწინებული წესით, კანდიდატის წარდგენის პროცედურას ხელახლა იწყებს. თუ ორმა ან მეტმა კანდიდატმა ხმების თანაბარი საჭირო რაოდენობა მიიღო, გადამწყვეტია საპროკურორო საბჭოს თავმჯდომარის ხმა.

12. საპროკურორო საბჭოს წევრი კანდიდატს ირჩევს „პროკურატურის შესახებ“ საქართველოს ორგანული კანონის მე-16 მუხლის პირველი პუნქტით განსაზღვრული კრიტერიუმების - ზნეობისა და მორალური ღირებულებების, კვალიფიკაციის, პროფესიონალიზმის და გამოცდილების გათვალისწინებით.

13. გენერალური პროკურორობის კანდიდატების შერჩევის პროცესთან დაკავშირებული სხვა საკითხები წყდება საპროკურორო საბჭოს სხდომის დამსწრე წევრთა უმრავლესობის გადაწყვეტილებით.

მუხლი 4.

1. საპროკურორო საბჭო შერჩეულ კანდიდატს შესაბამისი წერილობითი დასაბუთებით წარუდგენს საქართველოს პარლამენტს.